



**BOSNA I HERCEGOVINA**  
**VIJEĆE MINISTARA**  
*Generalno tajništvo*

Broj: 06-50-1-1729/11  
Sarajevo, 14.10.2011. godine

**BOSNA I HERCEGOVINA**  
**PARLAMENTARNA SKUPŠTINA BOSNE I HERCEGOVINE**  
**SARAJEVO**

PRIMLJENO: 17-10-2011			
Organizaciona jedinica	Klasifikaciona oznaka	Redni broj	Broj priloga
01-50-1-15-8		11	

**PARLAMENTARNA SKUPŠTINA BiH**

*- Zastupnički dom -*

**SARAJEVO**

**PREDMET:** Odgovor na zastupničko pitanje – dostavlja se

Vijeće ministara Bosne i Hercegovine, na 163. sjednici održanoj 5. i 10.10.2011. godine, utvrdilo je Odgovor na pitanje koje je postavila Nermina Zaimović Uzunović, zastupnica u Zastupničkom domu Parlamentarne skupštine Bosne i Hercegovine.

U privitku prosljeđujemo Odgovor radi njegovog dostavljanja zastupnici.

S poštovanjem,

**GENERALNI TAJNIK**  
*Zvonimir Kutleša*





**BOSNA I HERCEGOVINA  
VIJEĆE MINISTARA**

Broj: 06-50-1-1729/11  
Sarajevo, 10.10.2011. godine

Nermina Zaimović Uzunović, poslanica u Predstavničkom domu Parlamentarne skupštine Bosne i Hercegovine, na 8. sjednici Predstavničkog doma održanoj 25. avgusta 2011. godine, pokrenula je poslaničku inicijativu koja glasi:

**“Ja imam jednu poslaničku inicijativu koja se odnosi na poništenje oglasa koji je objavila Agencija za državnu službu 10. avgusta 2011. godine i koji je zavredio i medijsku pažnju zbog velike nekorektnosti koje su unutar navedene.**

**Naime, Agencija za državnu službu objavila je oglas 10. avgusta 2011. godine i u oglasu stoji da kandidat treba pored općih uvjeta ispunjavati da je prema njemu prestala pravna posljedica presude za krivično djelo nasilja u porodici. Ovakav oglas može se samo razumjeti na jedan način. U Agenciji, odnosno za poslove za koje Agencija raspisuje konkurs, mogu da se zaposle samo muškarci jer se cijeli oglas obraća isključivo muškim kandidatima i da je po mogućnosti nasilnik u porodici.**

**Poznato je da je BiH potpisala cijeli niz međunarodnih pravnih akata kojima se odlučno opredjeljuje za borbu protiv svih oblika nasilja nad ženama. U zemlji u kojoj postoji i koje je evidentno nasilje u porodici, ovakav oglas predstavlja sramotu za državne službe.**

**Zbog toga tražim od Agencije da se ovaj sramni oglas poništi jer je diskriminatorski i da se raspiše ponovni koji će biti u skladu sa normama koje je prihvatila BiH i ugradila u svoje zakonodavstvo.**

**Moram da napomenem da, ne samo da je ovo moja inicijativa, nego su me potaknule i niz nevladinih organizacija koje su mi skrenule pažnju i tražile od mene da danas se o ovom oglasim”.**

Na pokrenutu poslaničku inicijativu Vijeće ministara Bosne i Hercegovine, u smislu člana 37. Zakona o Vijeću ministara Bosne i Hercegovine (“Službeni glasnik BiH”, br. 30/03, 42/03, 81/06, 76/07, 81/07, 94/07 i 24/08), na 163. sjednici održanoj 5. i 10. 10. 2011. godine, utvrdilo je sljedeći

**ODGOVOR**

Vijeće ministara Bosne i Hercegovine, na 149. sjednici održanoj 27.4.2011. godine, upoznato je sa Informacijom u vezi sa ponovnim imenovanjem članova Odbora državne službe za žalbe i s tim u vezi zadužilo Generalni sekretarijat Vijeća ministara Bosne i Hercegovine da pripremi tekst javnog oglasa za izbor članova Odbora državne službe za žalbe i isti dostavi Vijeću ministara radi utvrđivanja. Istovremeno, zadužen je Generalni sekretarijat da pripremi prijedlog za imenovanje

konkursne komisije u skladu sa članom 63. stav 4. tačka b) Zakona o državnoj službi u institucijama Bosne i Hercegovine i isti dostavi Vijeću ministara radi konačnog imenovanja ove komisije. Na istoj sjednici Vijeće ministara je zadužilo Agenciju za državnu službu Bosne i Hercegovine da nakon utvrđivanja teksta javnog oglasa od strane Vijeća ministara, isti objavi na službenoj internet stranici Agencije i u najmanje tri dnevna lista koja se distribuiraju na cijeloj teritoriji Bosne i Hercegovine.

Postupajući po naprijed navedenim zaključcima, Generalni sekretarijat Vijeća ministara Bosne i Hercegovine je, u skladu sa odredbama Zakona o državnoj službi u institucijama Bosne i Hercegovine, odredbama Zakona o platama i naknadama u institucijama Bosne i Hercegovine, odredbama Odluke o osnivanju Odbora državne službe za žalbe, te odredbama Pravilnika o unutrašnjoj organizaciji Odbora državne službe za žalbe, sačinio Prijedlog teksta Javnog oglasa za izbor i imenovanje članova Odbora državne službe za žalbe, kao i Prijedlog rješenja o imenovanju Nezavisne komisije za izbor članova Odbora državne službe za žalbe, koje je Vijeće ministara Bosne i Hercegovine utvrdilo tj. donijelo na 156. sjednici održanoj 28.7.2011. godine.

Napominjemo da su prilikom sačinjavanja teksta Javnog oglasa za izbor i imenovanje članova Odbora državne službe za žalbe, u pogledu opštih uslova koje kandidati za članove Odbora moraju ispunjavati, dosljedno primjenjene odredbe člana 63. stav 4. tačka a) Zakona o državnoj službi u institucijama Bosne i Hercegovine, koje glase: **“Javni konkurs za popunjavanje slobodnih radnih mjesta u Odboru se oglašava na službenoj internet stranici Agencije i u najmanje tri dnevna lista koja se distribuiraju na cijeloj teritoriji Bosne i Hercegovine, najmanje 15 dana prije roka za predaju molbi. Oglas sadrži iste uslove koji su navedeni u članovima 20.3. i 22. ovog zakona”**.

Članom 20.3. Zakona o državnoj službi u institucijama Bosne i Hercegovine, propisano je šta sve treba oglas da sadrži (opis upražnjenog radnog mjesta, opis vrste konkursa, popis najvažnijih oblasti konkursa, spisak potrebnih dokumenata, rok i mjesto njihovog podnošenja, posebne akademske i profesionalne uslove za radno mjesto koje se popunjava i druge uslove koji se mogu smatrati primjerenim za odgovarajuće radno mjesto), a u članu 22. stav 1. istog Zakona taksativno su pobrojani svi opšti uslovi koje osoba mora ispunjavati da bi bila postavljena za državnog službenika, odnosno imenovana za člana Odbora državne službe za žalbe, među kojima se pod tačkom f) nalazi i uslov: **“da su prema takvoj osobi prestale pravne posljedice presude za krivično djelo nasilja u porodici, izrečene pravosnažnom sudskom presudom, u skladu sa krivičnim zakonima”**. Dakle, nesporno je da se u konkretnom slučaju radi o zakonskoj odredbi koja nikako nije mogla biti izostavljena iz teksta Javnog oglasa za izbor i imenovanje članova Odbora državne službe za žalbe.

Predmetni Javni oglas utvrđen na način kako je to naprijed navedeno, a postupajući po zaključku Vijeća ministara Bosne i Hercegovine, sa 156. sjednice održane 28.7.2011. godine, objavila je Agencija za državnu službu Bosne i Hercegovine, 10. avgusta 2011. godine, na svojoj službenoj internet stranici, kao i u dnevnim novinama “Oslobođenje” Sarajevo, “Glas Srpske” Banja Luka i “Dnevni list” Mostar. Do krajnjeg roka za podnošenje prijava na navedeni Javni oglas (25. avgust 2011. godine), Generalni sekretarijat Vijeća ministara Bosne i Hercegovine zaprimio je ukupno 28 prijava, od koji se 16 prijava odnosi na kandidate-žene, šest prijava na kandidate-muškarce, a za šest prijava ime kandidatâ je nepoznato, što ukazuje na činjenicu da predmetni Javni oglas nije proizveo diskriminirajući odnos na kandidate u bilo kojem pogledu a posebno u pogledu njihovog ravnopravnog učešća u ovoj konkursnoj proceduri.

Zbog svega navedenog, smatramo da ne postoje opravdani razlozi za poništenje Javnog oglasa za izbor i imenovanje članova Odbora državne službe za žalbe, te ukazujemo na činjenicu da se "sporna" odredba iz Zakona o državnoj službi u institucijama Bosne i Hercegovine, može mijenjati ili brisati isključivo kroz proceduru izmjene navednog Zakona.